

四庫全書

子部

欽定四庫全書

子部

通雅卷二十四

詳校官中書臣朱文翰

員外郎臣牛栓文覆勘

總校官降調編修臣倉聖脉

校對官中書臣高中

謄錄監生臣施銑

欽定四庫全書

通雅卷二十四

明 方以智 撰

官制文職

臺主憲長也。秦御史大夫位上卿。漢仍之。選郡守相高第為之任職者為丞。相復置兩丞。一曰御史丞。一曰中丞。成帝更名大司空。元魏踵此而中丞出外為臺主。更名御史長史。魏初改中丞為宮正。晉歷南北朝並不置大夫。以中丞為臺主。唐因隋設大夫一丞二後改為

司憲不久復故宋仍唐而無大夫以中丞為臺長今則猶西漢也中丞至六朝鹵簿出入千步絳騶清道與皇太子分道王公遜避嘗曰避中丞赤捧唐制大夫中丞午後三刻出迴避宰相如午前出宰相迴避大中大夫節卿曰丞相猶太宰御史大夫猶小宰御史之中丞少府之尚書猶宰夫大長秋猶內宰而屬少府自武帝時中丞始不得居中制事而光武政歸臺閣不任三公此周官之大體所必不可復也按漢表成帝省詹事并屬

大長秋而少府下言諸僕射署長中黃門皆屬

持書御史即治書也 嚴延年傳注天子欲有拜詔持

書御史發符下太尉通典曰中丞舊持書侍御史也胡

廣曰宣帝齊居沒事令侍御二人治書侍御史唐為中丞

隋先于相府置察非掾後改為治書侍御史魏置治書執法

漢表在殿中蘭臺掌圖籍外督舉劾建武中特詔與司

隸校尉尚書令三司各專席而坐曰三獨坐梁重其選

給三駒執盛印青囊後魏北齊曰南臺或曰南司唐御

史臺門北闢取陰殺也宋天禧時置言事御史六員元豐復六察以御史專領漢御史乘屬者天子出御史除二人為乘曹護車馬武紀御史乘屬在廟傍是也御史裏行始自馬周以布衣令于監御史裏行遂有此名會要曰始于龍朔用王立本為之

南床雜端也通典言侍御史職有四謂推彈公廨雜事知雜事者謂雜端最為雄劇食坐之南設橫榻謂之南床或曰即轉南省此如今掌河南道京畿道也裏行

蓋如今之試御史也今稱御史為烏臺以朱博傳御史府中列柏木常有野鳥數千也于文定泥顏氏家訓以為鳥誤作烏智按唐宋來皆用烏府考漢書原作烏字或顏別見一本邪

三院臺院殿院察院也 御史在周為柱後史秦為侍御史監理諸郡亦謂監察御史漢罷監察之名魏置掌八部蘭臺二人居殿中側陛而坐晉復置檢校御史隋改檢校為監察唐仍隋而置三院一曰臺院侍御史隸

焉號臺端二曰殿院殿中侍御史隸焉號副端三曰察院監察御史隸焉號分察三院幾二十員而內供奉裏行各如正員之半宋仍唐三院以知雜為侍御言事而殿中侍御六察為監察近時十三道不分三院內糾外按人人可以言事然初為試厯三差後為道長亦其遺意也

六察察六事又察六部也 監察御史第一人察吏禮部第二人察兵工部第三人察戶刑部唐百官志又載

察六事一察官善惡二察戶口帳籍賦役三察農桑倉廩四察賊猾私蠹五察德行才能六察黠吏豪宗其察六部乃興元元年事也元和四年以新人不出使無以觀能否乃令額察尚書省號六察官

唐之獻納院宋之檢院古納言也 唐虞納言以出納帝命故今以通政司為古之納言周官內史掌叙事之法受納訪以詔王所治蓋其職也秦漢以來統于三省門下省侍中黃門侍郎掌出納帝命中書省掌制詔宣

傳尚書省令丞掌通章奏北周保定改侍中為納言唐  
因之又改侍中又改左相掌獻替贊相禮儀審覆奏抄  
垂拱置匱以諫議充知匱使中丞為理匱使天寶九載  
改為獻納使宋雍熙改匱為檢景德改登聞檢院命直  
學士張詠判又有鼓院凡文武臣僚閭門無例通進文  
字并先經鼓院未經鼓院者檢院不得收接周禮達窮  
者與遽令鄭司農云窮寃擊此鼓以達于上則敢諫之  
鼓此其遺矣匱使屬諫議大夫即屬門下省則猶納言

屬也宋又有通進司銀臺司掌受天下章奏進御院進  
奏院掌受勅及百司符牒故今稱通政司為銀臺宋朝  
通進銀臺司舊隸樞密院凡內外奏覆文字必關二司  
然後進御樞密學士向敏中請別置局淳化四年以宣  
徽北院聽事為通進銀臺司命敏中及張詠同知二司  
事發勅司舊錄中書尋命銀臺司兼領之又以給事中  
封駁隸通進銀臺司由此觀之通進銀臺其職在禁中  
或如今之會極門收本之文書也明德元年文德殿兩

廊門賜名左右嘉福又東西上閣門內正南門曰左右長慶壯曰左右嘉肅次壯門曰左右銀臺學士翰林院在其內李肇記學士出銀臺乘馬是也

大棘廷尉也 有虞曰士夏曰大理周為司寇秦制廷尉漢景更名大理武帝復名廷尉哀復名大理後漢復名廷尉蓋漢無司寇故廷尉為重有正監及平謂廷尉三官隋名大理寺唐宋因之宋有大理獄官左斷刑右治獄分左右廳廳各五案鄭氏綺談云大理曰大棘晏

公類要云棘司近日既有刑部又設大理寺與都察院稱三法司有大獄則公斷之

漢以後之九寺棘卿非三代之九卿也 夏商九卿周六官與三少周禮朝士掌外朝之法左九棘孤卿大夫位焉六卿三孤也漢襲秦自丞相御史大夫外有正卿九太常光祿勳衛尉太僕廷尉鴻臚宗正大司農少府亦曰九寺大卿又至十二卿有執金吾大長秋將作大匠魏晉宋齊如舊梁置十二卿北齊九寺唐亦因之皆

曰棘卿宋設九卿皆以為命官之品秩而無職事元豐正名始有職掌中興以來併省冗職除太常寺大理寺不罷外宗正以太常兼而衛尉并工部太僕併駕部太府司農併戶部光祿鴻臚併禮部紹興復置太尉司農餘遂廢廢之是也今制以六部都通大為九卿此外則太常太僕光祿鴻臚尚寶而已

三珪之位謂三卿皆執珪也 楚昭王迎屠羊說以三珪之位

藻衣花綬卿服也 漢官儀曰衣裳卿大夫藻火又曰  
綬青地桃花

尚書裏行太常也 秦為奉常景帝六年改為太常漢  
官解詁曰太常為九卿之首職略曰太常在六曹之下  
與尚書丞郎同次謂之尚書裏行屬有大樂令大予雅  
樂郎大祝太宰今用大史令大卜令醫令大官令

漢有宗伯乃宗正卿非禮部也 漢平元始五年詔曰  
宗室自太上皇以來族親各以世民郡國置宗師以糾

之致教訓焉二千石選有德義者以為宗師考察不從  
教令有寃失職者宗師得因郵亭書言宗伯請以聞晉  
灼曰宗伯宗正也近時宗人府以勳戚領之周語曰仲  
山甫曰古者司民協孤終司商協名姓注司商掌賜族  
受姓之官此即宗正之職矣

今之光祿寺非昔光祿勲漢之光祿勲乃秦之郎中令  
也秦郎中令掌宮殿掖門戶漢更名光祿勲解詁曰  
勲之言闔也此解不通北齊曰光祿寺兼掌膳食帳幕

唐龍朔改司宰光宅改司膳自此與光祿勲絕特襲其名耳宋仍唐元豐官制屬有大官令上林司而自宋及元復有宣徽院客省使亦掌燕饗饔餚前代初置宣徽院後改光祿寺與古懸遠而進階有光祿大夫猶古遺意也漢光祿勲屬有諫議大夫中郎三將郎中三將騎郎將羽林令監奉車都尉騎都尉謁者光祿郎表有中大夫太初改光祿大夫

大農令秦之治粟內史也 漢因秦置景帝更名大農

令武帝更名大司農掌錢穀貨幣以當時無戶部也屬  
有太倉令均輸令平準令都內令藉田令導官令幹官  
廩犧令駿粟都尉市長道守官主春御米及作乾糒詳下條  
幹官幹鹽鐵也

秦漢之少府猶周之玉府內府也 掌山海池澤之稅  
名曰禁錢志曰掌中服御寶貨珍膳屬有符節令大官  
令尚食五尚太官獻丞湯官令丞樂府令若盧令莊戈  
令織室令黃門令給事中鉤盾令尚方令御府令掖庭

令守宮令上林令凡太醫大官守宮上林四官屬少府  
自侍中至御史皆以文屬焉宋中興裁司農少府併于  
戶部極是惜又復之耳

秦漢之衛府周之宮正也　掌宮門衛屯兵寶宮正之  
職而秦郎中令亦掌宮殿掖門戶或曰亦宮正也錦衣  
衛考略以為郎中令似錦衣之職此特謂羽林屬之耳  
漢表自有中尉太初更名執金吾掌循徼京師有緹騎  
二百人然今錦衣衛司朝內鹵簿護衛則正兼衛尉之

任矣而唐之內宦主軍如神策軍使正中尉也古今之官名相倣而職掌不同安能強定而合之乎衛尉屬有公車令大誰長衛士令衛司馬衛侯旅賁令

執御前驅猶古太僕之遺意也 周禮有太僕下大夫掌正王之服位出入王之大命王出入則自左馭而前驅周穆置太僕正以伯冏為之秦特襲其名耳漢太僕領五監六廄王莽改太御後漢復名太僕天子每出奏駕上鹵簿用大駕則執御魏因之晉宋不嘗置郊祀則

權置執轡事畢則省唐領秉黃典廢典牧車府等四署  
天下監牧置八使宋初輿馬之政分隸郡牧驥驥院太  
僕但掌天子五輶屬車耳今之太僕則竟管馬政矣漢  
太僕屬有騎馬令未央殿令考工令車府令牧師莞令  
漢之鴻臚秦之典客周官之大行人也 周官有行人  
掌大賓客之禮象胥掌蠻夷閩貉之國使秦有典客掌  
諸侯及歸義蠻夷即是官也漢名鴻臚應劭曰鴻聲也  
臚傳也屬官有行人譯官別火三令丞及郡邸長丞凡

事之尊重者遣大鴻臚而輕賤者遣行人也景帝改名大行令武帝更名大鴻臚秦有典屬國成帝併入大鴻臚隋開皇廢之入太常尋復置唐曾改司文司賓皆復舊領典客司儀二署宋南渡併入禮部近代鴻臚卿專為臚贊之官士夫不歷此官惟南都之鴻臚卿為大老迴翔之地耳周行人司聘問春秋列國皆有之風俗通曰周秦以八月遣輶軒之使采異代方言皆是也藝文志曰縱橫家者流蓋出于行人之官秦漢以後奉使者

不名行人如巡行之博士直指之繡衣觀風之八使按察之六條其職尊其事重矣今日之行人司正古行人職也

漢之謁者今鴻臚之職也 僕射為謁者臺率常侍謁者五人謁者三十人初為權謁者滿歲為給事謁者表曰掌賓讚受事智以為正鴻臚鳴贊之事也而漢鴻臚屬國之職則今有提督四蠻館屬之太常少卿

舌人譯官也 周語使舌人體委與之注舌人能達異

方之志象胥之官也周禮大行七歲屬象胥諭言語司農云象胥譯官也漢志象來致福注象譯也漢表典屬國屬官有九譯令

符璽令合典瑞掌節之職也 春官有典瑞地官有掌節漢因秦置符璽令位次御史中丞別為一臺晉併蘭臺置符節御史齊置主璽令史隋有符璽局置監屬門下省煬帝改為郎唐因之宋元仍置符寶郎屬門下殿中此時為尚寶司

大均祭酒也 胡廣曰凡祭酒者賓得主饌老者舉酒  
祭地言為長也 大均即成均也 虞命典樂教胄子周禮  
有師保成王時彤伯入為祭酒戰國荀卿為祭酒漢吳  
王漢年老為劉氏祭酒祭酒之名久矣 漢置博士祭酒  
一人晉立國子學宋太始置總明觀祭酒一人有四科  
齊梁號為國師北齊曰國子寺隋置太學大業改為國  
子監有祭酒司業丞主簿錄事博士助教唐龍朔改為  
司成館天寶置廣文館宋置判監事元豐始名祭酒司

業南渡併歸禮部近日設之專以詞林升轉

將作少府周官之匠人也 景帝更秦之將作少府曰

大匠光武省以謁者領之章帝復置隋改監匠為大令

唐復為匠宋建炎併歸工部紹興復置

節度開府賜旌節者也 唐初道有將一人曰大總管

已更名大都督太宗時行軍曰總管在其本道曰大都

督高宗永徽都督帶使持節者始謂之節度使然猶未

以名官通典曰自景雲二年始以賀拔延嗣為涼州都

督充河西節度使通鑑綱目景雲元年冬以薛納為幽  
州經略節度大使節度之名自此始考孫權初置節度  
官使典掌軍糧漢順帝時武都太守趙冲平羌有功詔  
冲督河西四郡兵為節度節度之義起此質帝時以滕  
撫中郎將都督揚州軍事都督之義起此唐高宗儀鳳  
元年遣大臣分道巡撫以宰相來恒為河南道大使薛  
元超為河北道大使左丞崔知悌司業鄭祖玄為江南  
道大使後又謂之存撫于文定曰此巡撫所由起也智

謂名義已起于後漢事任已起于魏隋通鑑與實錄皆載武德元年淮安王神通為山東道安撫大使山東諸軍並受節度會要載武德中唐儉為并州道安撫大使李靖為嶺南撫慰大使鄭善果為山東招撫大使又後魏太和中廣陵王羽持節安撫六鎮酈道元慰撫關右隋楊素為河北安撫大使豈必以存撫之名為近于巡撫哉其實自黃帝以四監舜以五長周以十連秦漢而後名稱雜出漢文遣丞相出刺史置部刺史察州宣

帝置都護加官魏文置都督軍事或領刺史晉武置大  
都統後周改總管此後廢大都督府置大行臺即節度  
也貞觀別置經略又遣人使巡省則有巡察安撫存撫  
諸名元和置宣撫宣慰大中置招討要之使名雖多而  
主其事任者道止一人而已加官有大小大至使相其  
曰開府一也嗣是有以邊阨開府以總制者即古制置  
總管都督節度宣撫等也有開府以巡撫者即古安撫  
等使而專省提封亦有都督節度之權特官次于總督

猶之魏晉大都督為上次有監將軍督諸軍使持節與  
假節隋有大都督師都督都督也時有宰相經略開府  
者即古大都統招討使相也有以鹽法屯田漕儲河渠  
開府以總理者即古總領經制度支營田之任也開府  
之名昉于魏黃權以車騎將軍開府儀同三司是也唐  
初遣御史按察十道即今之巡按立二十四府都督即  
今之巡撫已復停止改為五十四道采訪使以刺史領  
之又一變也宋宣撫甚重即今總制也鄭剛中為宣撫

副使大將吳璘官至少師請講鈞敵之禮剛中曰少師雖尊猶都統制耳倘變常禮是廢軍容璘乃惶恐聽命曾見邊帥于制府猶此禮也元用御史臺言各路按察歲二月分巡按治十月還司此乃各省設行臺行臺御史其體輕也近代巡方歲更與漢時遣刺史法同唐宋以來未行也近日壞天下者巡方此官在得人豈官制不善乎智對德政殿謂用兵之地撤監軍並撤巡方以其掣督撫肘也

今以方伯稱藩司廉使稱臬司謂其近似也 何武曰  
刺史古之方伯上所委任一州表率也其實漢刺史秩  
卑于太守非古方伯之位也今遂以刺史事比藩臬漢  
遣刺史一歲而更有似乎今之巡方而繡衣乃閒遣者  
也今兩司則外官矣觀察提舉大約相似自唐置巡察  
使開元置採訪處置使其有戎旅之地即為節度使宋  
有轉運使又有提舉是唐之州縣不過一使臨之而宋  
則有帥漕憲倉四司故州縣極難承奉蓋節度主兵觀

察主民然節度多兼之各道雖有度支營田招討等使  
然亦多兼使名雖多而主其事者一人而已宋則監司  
各有建臺之所元設行中書省故官為多明亦因之改  
承宣布政按察之名余常笑兩府一道而有巡方則監  
司亦大知府耳絕非有古刺史之權也吳曾曰徐邈與  
范寗書曰擇公方之人以為監司監司名見此

京部置尹古今所同也 秦京師為內史景帝分左右  
武帝更右名京兆尹左名左馮翊秦有主爵中尉景帝

更名都尉武帝更名扶風是為三輔治長安城中尹一人丞二人後漢置河南尹三輔不改號但減秩耳又以左馮翊右扶風屬司隸校尉尋省魏晉因之江左為丹陽尹北魏曰代尹東魏曰魏尹北齊清都尹北周及隋復為京兆尹唐京兆本雍州置牧親王領之別駕貳牧永徽改長史開元改京兆尹少尹二人魏晉有治中隋改司馬煬改贊治後改為丞五代有開封尹宋置權知府以待詔以上充蔡京乞罷之置牧尹各一牧以皇子

領尹以文官充崇寧中定京畿四府明制南北兩京尹丞皆與京堂一例治中而下以他流充之唐判司有雙曹徐抗當德宗時奏省之

古今州郡之名異刺史太守之任亦異 春秋時縣大而郡小左傳曰上大夫受縣下大夫受郡周書作雒篇曰千里百縣縣有四郡戰國時郡大而縣小甘茂謂秦武王曰宜陽縣大名曰縣其寔郡也漢有郡國皆統于州然州乃部之名或十二或九後漢分十四部至南北

朝天下有餘州而郡猶屬焉隋廢郡存州州即郡也煬帝又改唐又罷郡置州宋元以來設府于州府即州也明制以州屬府則分為二矣此郡國州縣名實之辨也智以為古州縣之名亦有同時同名而實不同者作誰篇亦未可據也別有論秦罷侯置守漢景帝中元二年更名太守郡為諸侯王國者置內史成帝省內史以相治民如太守或以尚書令僕射出為郡守鍾離意黃香桓榮胡廣是也或自郡守入為三公虞延第五倫桓虞

鮑昱是也汲黯以諸侯相秩居淮陽馮野王為大鴻臚  
以秩出為上郡太守此秩尊于守也京房守魏郡以八  
百石居黃霸守潁川以比二千石居官後歸潁川故官  
以八百石居郡此秩卑于守也晉郡守皆如將軍後魏  
初郡置三太守北齊制郡九等隋如之至開皇罷郡以  
州統縣大業又改郡唐武德改州改太守為刺史加號  
持節後加號為使持節諸軍事而實無但頒銅魚符而  
已天寶初改州為郡自是州郡史守更相為名其實一

也垂拱間諸州都督刺史准京官帶魚長安中以臺閣  
省寺分典大州于是鳳閣侍郎韋嗣立御史大夫楊再  
思二十人以本官檢校刺史後有兵鎮刺史皆加團練  
使五代仍刺史之號宋召諸鎮于京師賜第留之分命  
朝臣出守列郡號權知軍州事與後文武官參為知州  
軍事及帶中書樞密院宣徽使職事稱判太守亦稱知  
府張文定方平擢知開封府張忠定詠知益州曰爾輩  
得好知府矣元置上路達魯噶齊上路總管兼府尹正

三品又有下路上州中州下州至五品而止近時知府  
上有監司撫按戶工刑三部郎為之間有臺臣年例轉  
知府以為大辱權輕極矣今人用太守事猶可借若用  
刺史稱今之知州則相去殊遠秦有郡丞漢因之設治  
中別駕從事晉省丞隋改別駕治中為長史司馬煬帝  
罷之置通守又置贊治位通守下唐廢丞改別駕已復  
為長史宋置諸州通判詔知府公事并須長史通判僉  
議聯書方許行下又考唐天寶後有判官之名後漢長

興間詔有兩使判官防團推官于時判官多本州自辟舉清泰中始擇朝士為之宋兩司置判官推官餘州亦置判推二官元止置司馬焉司理參軍則因五代以來諸州皆有馬步獄以牙校充馬步都虞侯掌刑法謂之馬步院宋開寶始置諸州司寇參軍進士及選人為之後改為司理掌訟獄勘鞫之事不兼他職是亦唐之司法參軍也今日特重司理耳

即拜就其所在拜授也 成帝即拜班伯定襄守哀帝

即拜龔舍為泰山守文帝就加魏尚亦即拜也舊云即拜者便道之官其曰策拜者初除之官大行奏策如蕭昱為南郡太守入殿受策是也

秦漢以來縣分二等北齊分九等隋復古分令長唐六等宋三等其曰畿赤者京縣與畿內也 鄭珣瑜傅貞元初詔擇十省郎治畿赤唐縣有赤畿望緊上中下六等赤畿為一等也一作七等京都所治為赤縣旁邑為畿縣明代初縣亦分三等上縣命從六品中正七下從

七已定命並七品今選亦分大小而京縣反無甲科按周有縣正秦制縣萬戶以上為令減萬戶為長漢因之綏和初長相墨綏建平間復黃綏晉制不經宰縣不得入為臺郎後魏縣置三令長北齊置縣為九等唐分六等宋建隆初諸縣除赤畿外有望緊上中下五等始以朝臣為知縣乾德初詔京官知縣以三年為任于文定曰宋大縣四千戶以上選朝官知小縣三千戶以下選京官知故知縣與縣令異縣令即古長吏之職知縣則

以京朝官之銜知其縣事非外吏也朝官京官亦自有  
別朝臣知縣自大理正奚與等始元縣各有達魯花赤  
掌縣印以知縣為縣尹掌判縣事而丞也尉也主簿也  
皆古有之元之呼赤者言正掌職事也凡官皆有赤紹  
興中詔將作監丞簿等任滿已改官來厯民事者各與  
堂除知縣一次并借緋章服尋詔吏部自後縣差文臣  
又詔非兩任縣令不除監察御史乾德詔京官知縣以  
三年為任今則進士初選為之考選與中行評博皆以

四年四月為期榆塲集曰唐虞之諸侯不世及而受黜  
陟于朝政與後世守令同特名異耳周成王曰唐虞建  
官惟百內有百揆四岳外有州牧侯伯故知唐虞諸侯  
皆天子之官也觀于虞夏分州而知郡縣非秦始也

鈴閣鈴下閣中也 鈴閣之下侍衛不過十數人三省  
曰鈴鈴下閣閣中官有鈴下威儀之名是也今人皆似  
以轅門郡閣之類視之誤矣管輅為安平太守王基言  
烏與燕關者老鈴下之妖盧充見鈴下唱客前

日官周日正也 程本曰召子元而訓之曰昔吾之宗君為周日正周公定鼎郊廟修和周郊吾宗君薦其所以為祥者曰井田之璞大山之器車唐叔異畝之禾始有蒲璧以朝作程典令其顯庸書在政府左傳桓十七年天子有日官諸侯有日御日官居卿以底日注謂典歷數者張衡再轉復為太史令曰曩滯日官今又原之史記有日者傳因日官主日故善卜者以為名陳涉世家周文視日謂能擇日也

疇官世習以為官也。如淳曰：律年二十三傳之疇官各從其父疇學之，史歷書疇人子弟分散乃習天文者。如淳曰：家業世世相傳為疇智。按漢儀注民二十三為正為衛士材官曰疇官猶言常規官法也。管子曰：人與人相疇，家與家相疇，言習為常也。後山以為籌人言疇莫也。弱侯曰：儔輩也。與亮采惠疇之疇同。

計相主計也。北平侯張蒼為計相注。如淳曰：計相官名主計會。

掌故掌故事也。晁錯兒寬匡衡皆為之應劭曰掌故六百石主故事屬太常而表與志不載漢官儀太史有掌故三十人房鳳射策乙科為太史掌故又有文學掌故

稗官小官也。藝文志小說家出于稗官如淳曰王者欲知閭巷風俗故立稗官使稱說之師古曰稗音移稗之稗小官也。漢名臣奏唐林請省署吏公卿大夫至都官稗官減什二

三工官謂考工室右工室東園匠也 見貢禹傳師古注皆屬少府谷永傳有工服官續志郡有鹽官鐵官工官都水官元紀罷齊三服官地理志南海郡有圃羞官交趾羸瘳有羞官嚴道有木官朐腮魚復有彌官丹陽銅官桂陽金官唐六典注漢將作屬有甄官親蠶有蠶官此表志多遺者或云唐虞有父斯以所事名亦工官也

鼎官鼎士也 東方朔傳夏禹為鼎官注今殿前主鼎

者鄒陽書全趙之時武力鼎士鹽鐵論戲車鼎躍咸出  
補吏正謂舉鼎之士也

靜室令即請室令也 續志光祿勳有請室令車駕出  
在前請所幸賈生造請室注亦引此言此官有別獄史  
記作清室後漢張禹表曰王者止則交戟清道而後行  
清室而後御文紀注應劭曰遣靜室令令先案行清靜  
殿中以虞非常楊秉傳警蹕而行靜室而止注靜室謂  
先使清宮也前書音義曰靜室令漢有之由此論之必

有一訛在前請所幸之說乃傳會矣

大與主爵祿之官也 闢氏侯馮解散以代大與降漢  
師古曰大與主爵祿之官

遊徼鄉之游行徼循督察者也 有被殺傷者亭長與  
游徼相參雜診之十里一亭亭有樓候望鄉嗇夫治之  
游徼即嗇夫之所統也徼工釣切凡邊疆通稱徼王宮  
之邊亦為徼道游循所部之境亦曰徼徼邊路也減宮  
少為縣亭長游徼黃霸少為陽夏游徼

門候周之門下士也 周禮司門干寶注如今城門校  
尉每門下士二人如今門候公車誰長之類蔡儀覆盜  
門侯蕭望之小苑東門候周秩官有門尹關令尹喜是  
也宋有門尹鄭有北門之管夜士注如今都候謂行夜  
徼候者

輯濯船官也 表水衡有輯令劉屈釐傳太子矯制發  
輯濯士注輯濯行船者短曰輯長曰濯與楫櫂同元后  
傳張周惟輯濯越歌地理志京兆尹船司空注本主船

之官遂以名縣

僕人倅也 唐制大使副使皆有僕苦念切人別奏大使

僕二十五人河西節度崔希逸襲破吐番于青海會希

逸僕人孫誨入奏事說文新附曰僕從人類篇曰侍從  
也智按即今之承差也古者副謂之倅倅又通為萃又  
謂之簉杜預曰副倅左傳曰翟泉人之女奔孟僖子僖  
子使助薳氏之簉

後判後司也 周禮贊治注曰贊治若今起文書草

也疏起文書草乃後判決是贊治之法今請人專管文  
移刑名因號之曰後司

尉氏古獄官也 漢志注陳留尉氏應劭曰鄭之獄也  
因以名其縣

雞人歌鷄鳴者也 蔡質漢儀曰凡中官漏夜盡鼓鳴  
則起鐘鳴則息衛士甲乙徼相傳甲夜畢傳乙夜相傳  
盡五更衛士傳言五更未明一刻後鷄鳴衛士鍾丞郎  
趣嚴上臺候朱雀門外守傳鷄鳴于宮中鷄鳴歌也周

禮鷄人夜嘵旦以昭百官象其知時也庭燎注王有鷄人之官王不正其官而問夜早晚巾車大祭祀鳴鈴以應鷄人東坡志林曰漢官儀汝南出長鳴鷄王洙曰謂取能歌鷄鳴之人也晉太康地記曰後漢固始公安細陽銅陽四縣衛士習鷄鳴曲于闕下歌之顏師古不考本末妄破此說唐有絳幘鷄人舒元輿御史臺中書院記監察御史二人立朝堂輓道鷄人報點押百官由通乾觀象入宣政門近制升殿有鷄人于東廊下唱日出

曉之歌

有秩鄉吏之名號也 黃長睿論歐陽集古錄有疎脫處如跋漢倉頡廟碑云此碑有蓮勺左鄉有秩池陽左鄉有秩池陽集丞有秩皆不知是何名號余按前漢書張敞以鄉有秩補太守卒史後漢百官志鄉置有秩三老游徼本注曰有秩郡所署秩百石掌一鄉人又注引漢官儀載戶五千則置有秩風俗通有秩則田間大夫智按禮記緇衣注綸今有秩嗇夫所佩也疏引漢百官

公卿表十亭一鄉鄉有三老有秩嗇夫

校官校官也 趙彥衛曰溧陽有東漢潘長史校官碑或疑其為校官字按後漢書永平十年南巡狩祠章陵日壯至又祠舊宅名校官子弟作雅奏鹿鳴帝自御頃筮和之則東漢鄉縣有校官矣

導官掌導擇米麥者唐作導嘗官 漢導官屬大司農張湯治它獄導官谷永請省導官費用唐史作導張文林曰相如封禪書導一莖六穗于庖注云導擇也說文導

瑞未也引封禪書道一莖六穗誤矣反改漢尊官為巢  
官詳見穀蔬類

里士鄉士即古之鄉三老也 顧隣初曰洪武十九年  
詔賜耆老粟帛京師應天府鳳陽府民年七十以上天  
下民年八十以上賜爵里士應天鳳陽民八十以上天  
下民九十以上賜爵鄉士與縣官平禮並免雜役冠帶  
服色別議頒行正官歲一存問此爵似即今之壽官而  
人多不知其名即漢之三老公乘爵級也智按管子有

士舍士謂里尉每里置舍使士居焉則有職掌與近日之里士鄉士不同殆二十等之公士上造簪裹不更乎



通雅卷二十四

欽定四庫全書

子部

通雅卷二十五

詳校官中書臣朱文翰

員外郎臣牛穎文復勘

總校官降調編修臣倉聖脉

校對官中書臣高 中

謄錄監生臣劉 禮

欽定四庫全書

通雅卷二十五

明 方以智 撰

官制 武職 兵制附

黃帝命大將夏始有本兵 獨孤及八陣圖記云黃帝  
法文昌以命將李靖曰黃帝始立丘井之法虛其中大  
將居之丘氏曰唐虞時兵政兼于刑官未有專司至仲  
康始命虞侯掌六師是本兵之官始于夏也古禮樂為  
二官而兵刑為一後則禮樂為一而兵刑為二古詳于

化而後詳于政也

祈父司馬也 襄十六年穆叔賦圻父注周司馬掌封畿之兵甲詩注亦曰司馬疏曰通作畿字古字通用尚書作祈司馬掌祿士故司士之官屬焉是爵祿黜陟由司馬也其屬又有司士之官主勇力之士故爪牙屬司馬也司右掌羣右之政令謂戎右齊右道右也齊右兼王路之右戎右兼田路之右

將軍始于周而秦漢以後文武通為之在國則為卿大

夫長正在軍則為將軍司馬卒伍古也 表將軍周末  
官左傳閭沒謂魏子為將軍國語鄭使詹伯為將軍吳  
有將軍司馬秦因之位上卿漢不常置或有左右前後  
其職為太尉省太尉則置大將軍驃騎將軍位次丞相  
武帝以衛青大將軍位在諸公上或置大司馬或大將  
軍兼大司馬如三公後志比公者四第一大將軍次驃  
騎次車騎次衛將軍東平王蒼以驃騎位公上則以其  
王也四征興于漢代四安起于魏初四鎮通于柔遠四

平立于喪亂晉之刺史郡守皆有將軍銜領晉武帝甚重兵官故兵校多選朝廷清選之士居之

後之都督元帥都統總管節度團練防禦皆漢之將軍也督軍之名起于漢都督之名起于魏建武八年張宗以謁者督諸郡軍平青冀盜永初元年召龐參拜謁者使西督三輔諸軍屯高彪傳第五永為督軍御史順帝末以馮緝持節督揚州諸郡軍事建康元年拜騰撫中郎將督揚徐二州延熹四年皇甫規為中郎持節

關西兵明年奏免督軍御史張稟九年張奐為護邊疆  
中郎將九卿秩督幽并涼三州及度遼烏桓二營于文  
定但引質帝時已為漏矣魏有上大將軍都督司馬懿  
征蜀加號大都督唐分諸道各置都督府則都督正漢  
之將軍也唐又有天下兵馬元帥副元帥晉太元間置  
河西大都督唐因黃巢亂置諸道行營都統宋之諸軍  
都統制自渡江前已有之然未為官稱建炎元年置御  
營司遂擢王襄愍淵為都統制名官自此始此正唐之

元帥而唐嘗以儲位領之猶宋以儲位領京牧也漢加大將軍亦都統也宋有馬步軍副都總管遇出征則加以都統制之名又有統制統領唐在本道曰大都督征討曰大總管宋諸州亦有總管總之持節一方則謂之節度團縛防禦因兵以名亦漢之將軍也古文武并用郡守即稱州將加官有大小不外于為將之意宋之都指揮亦將軍也石林燕語云自梁置在京馬步軍都指揮使後唐改為侍衛親軍周世宗更名殿前司宋因而

為三衛率以武臣充之今仍存其名于各衛而領兵則  
曰總兵官亦專以武臣充之而將軍遂為掛印之號及  
武職之勲階矣今之勲將古之戎右也或稱戎副或曰  
偏師或曰軍倅今之參將本參戎之意也古有遊擊今  
稱遊佐擊古有準備今稱守備皆偏裨也

五軍始于五營五府因于五督 漢壯軍有五營文帝  
置中壘後漢省之但置中候續志曰壯軍中候一人掌  
監五營即五校也魏晉逮江左皆置五校智按齊內政

楚荆尸即有中前後左右五營漢以後因之耳晉有左右前後四將軍已為二衛三部已又置虎賁羽林上騎異力四部并命中為五督此今日五軍都督府之所自也唐之三衛漢之郎衛也唐五府三衛志曰親衛之府一曰親府勲衛之府二曰勲一府曰勲二府翊衛之府二曰翊一府曰翊二府以資蔭補之朝會之儀三衛番上分為五仗號銜內五衛又有十率府自晉有中衛率隋分置十府唐因之皆以備天子東宮宿衛也武德七

年改親衛驃騎將軍為中郎將勲衛車騎將軍為郎將  
此正漢以郎執戟宿衛之意也三衛非權勢子弟徵退  
番後三衛益賤人罕趨之太和五年停資蔭近代之五  
府亦以世襲之侯伯充之五府但管京城之衛禁兵乃在  
京營戎政而宿衛大仗則屬於錦衣衛大漢將軍以一  
駙馬領之紅盔明甲將軍以一勳臣領之此正似唐千  
牛衛所掌耳

戶衛戶將也 表郎中令屬官郎中有車戶騎三將如

淳曰主車曰車郎主戶衛曰戶郎楊惲傳戶將尊師古  
曰官名功臣表郭蒙以戶衛起薛蟲達無害皆以戶將  
王嘉坐戶殿門失閑免注守殿門前五行志門衛戶者  
蓋寬饒行郎中戶將事

廄將主閑廄也重將主輜重也林將猶言羽林也城將  
築城之兵也弩則有弩將射則有樓煩將騎則有郎騎  
將慎將言謹慎也特將言勇特也粟客治粟也軍匠軍  
工也駢隣並兩騎為軍翼也說衛衛軍行之止舍也掌

軍門則有門尉掌旗幟則有職志掌敲遮則有塞路執矛執盾各有其職牛司馬騎司馬各効其用長隊將二隊將三隊將各因其材而游擊將軍以游擊為事長鈺都尉以長鈺為事此皆漢初軍制官名功臣表右司馬齊受以家車吏許盎以駢隣從起昌邑以說衛入漢說衛猶稅衛也周昌以職志擊秦陽城延以軍匠韓信為票客當是票客周竈為長鈺都尉張良以廩將陳豨以特將為游擊將軍郭蒙為城將宣虎為重將室中同

秦同為弩將耐跖為門尉陳涓蟲達以二隊將戎賜以  
三隊將亞將爰類以慎將許癮用趙右林將丁復為樓  
煩將高邑為上隊將郭亭為塞路文紀曰塞疏洪邁曰  
史記皆無此官名

唐之千牛衛宋之奉宸隊街仗猶今之錦衣衛也 今  
稱錦衣衛為執金吾此似而非也秦中尉掌徼循漢改  
為執金吾列九卿復掌京師盜賊考按從事後漢掌宮  
外戒司非常水火之事而衛尉巡宮中與金吾相表裡

唐神策稱中尉則中官矣錦衣衛考云本秦漢之郎中  
令也郎中令掌宮門戶漢名光祿勳期門羽林屬焉而  
衛尉實掌宮門衛屯兵則錦衣亦似衛尉論職為都指  
揮使則有似乎宋之殿前司今人稱校尉為緹騎則本  
于漢金吾之緹騎也唐金吾衛掌宮中京城巡警烽候  
道路水草之宜而千牛衛掌侍衛及供御兵仗以千牛  
備身左右執弓箭宿衛以主仗司戎器朝日領備身升  
殿列侍殆為近之宋有捧日隊殿前諸班也奉宸隊殿

前諸直也奉宸即唐千牛營二隊稱親扈鹵簿又皇城司掌入殿門圓號入宮門方號略似之而皇城司在內嘗以親王提舉非其職也其金吾街仗乎淳化金吾四營則魏丕新募太子親選如禁兵之制祥符七年金吾引駕仗是也明朝十二衛亦直宿衛而錦衣所掌者乃鹵簿儀仗旗手所司乃旗纛金鼓諸衛皆統軍卒而錦衣衛獨領校尉力士師周之虎賁旅賁也本以待功臣之子孫而今以內寺之戚緝事之功升焉詔獄係之則

又異矣漢執金吾屬有中司馬武庫令式道候應劭曰  
吾禦也師古曰金吾爲名主辟不祥崔豹古今注曰金  
吾棒也銅爲之金塗兩末禮小司寇大賓客前王而辟  
鄭司農曰若今時執金吾下至令尉奉引揚雄執金吾  
箴曰吾臣司金敢告執璜程大昌以爲金鉤其末呼曰  
封杖又見一條言漢志以爲馬則鳥訛也茶經謂椎曰  
木吾可爲左證互詳昆子條下

羽林者天有羽林星羽林孤兒者取從軍死事之子孫

養羽林官教以五兵也 師古曰如羽之疾如林之多  
巖郎羽林郎也 掌宿衛侍從常選以六郡良家補蔡  
質漢儀曰羽林郎百十八人無常員府次虎賁府本武  
帝以便馬從獵還宿殿陛中室中故號巖郎演繁露引  
為宣帝誤

佽飛熊渠取力士名也 古之刺蛟者見呂覽淮南服  
虔曰因以材力名官師古曰取古勇人以名官如熊渠  
之類是也唐武衛外府熊渠番上者分配之馮奉世傳

發越騎迹射佽飛斂者羽林孤兒表注少府有佽飛佽  
飛本合弋武帝改之韓非子衛弋有左弋者

期門期諸殿門也 東方朔傳微行始出常用飲酌已  
八九月中與侍中常侍武騎及待詔隴西北壯地良家子  
能騎射者期諸殿門故有期門之號屬郎中令平帝更  
名虎賁郎甘延壽試弁為期門上官桀為羽林期門郎  
傅介子傳有期門郎遂成

續志有虎賁中郎將非虎賁校尉也 虎賁中郎將屬

光祿勳平帝所改期門郎也虎賁校尉屬壯軍掌輕車  
後漢并射聲國語叔孫穆子曰天子有虎賁習武訓也  
諸侯有旅贲禁苗害也大夫有貳車備承事也士有倍  
乘告奔走也衛武公在輿有旅贲之規

蜀之散騎非黃門之散騎也 蜀志諸葛亮上言有賓  
叟青羌散騎武騎

漢別有衛將軍非衛尉亦非郎衛也 文帝拜宋昌衛  
將軍領南北十一月罷衛將軍此在南北軍之外三月

發中衛材官屬衛將軍長安十四年中尉周舍為衛將軍軍渭北宣帝拜張安世車騎將軍數月罷車騎將軍屯兵更為衛將軍兩宮衛尉城門北軍兵屬焉

怯薛元之宿衛也 元志有四大怯薛言分宿衛供奉為四壯國亦有都赤入直負骨朵于背

黃頭習流也 故乘上吳王書遣羽林黃頭循江而下注蘇林曰羽林黃頭習水戰者也 鄭通以濯船為黃頭郎注土勝水其色黃故刺船之郎皆著黃帽史記勾踐

發習流二千伐吳言習水戰也索隱引流宥五刑謂流  
放者使習戰迂矣

舟虞掌舟官也 國語叔向退召舟虞與司馬注舟虞  
掌舟

稱媿守捉也 中山王焉傳顯宗報曰今五國各官騎  
百人稱媿前行皆止軍游騎唐初兵之戍邊者大曰軍  
小曰守捉曰城曰鎮而總之者曰道如東萊守捉長樂  
守媿志曰守捉將千人漢之言媿正如唐之守捉其音

義相因可無疑也康傳圭發土團赴代州至城北捉隊  
不發言捉整其隊而不行也

路鈴即路將也 宋實錄曰陝西諸路四十二將河北  
諸路三十七將東西十三將其曰路鈴以為兵馬鈴轄  
也宋以朝官及諸司侯以上充或一州或一路或兩三  
路嘉祐詔內臣鈴轄都監者逐路止置一員但當官高  
資深者加都字稱都鈴轄也建炎三年要郡守臣兼兵  
鈴轄武臣為之副改都監為副鈴轄紹興三年守臣罷

兼兵職朝野雜記曰武臣為路鈐亦無尺籍伍符每歲猶徃諸郡按閱特存故事而已

元之萬戶府正今之都司也漢列郡有都尉唐之軍城守捉寶散在各道節度而下有防禦防禦正宋之鈐轄都監也元有行樞密院洪武初改翼元帥府又改行都督府已定為都指揮使掌都司管衛所戎政按元人既平江南于浙東一道置三萬戶府高郵參州置兩萬戶府揚州建康置七萬戶府杭州行省置四萬戶府其

體貌責任若今都閫之體而權力倍之洪武初衛所亦重後遂凌夷今紫低眉奔走于使者之前矣

軍正軍司馬也 藝文志軍正楊僕紀奏兵錄昭紀軍正王平擊益州胡建守軍正丞師古曰南北軍各有正又置丞衛青問其罪于正閱注張晏曰正軍正也史記穰苴名軍正問楊敞鄭衆梁颯班勇皆為軍司馬一曰軍司空主法之官即軍正也孔穎達曰上士得號行司馬及在軍二十五人長中士號兩司馬五人長下士

號公司馬以司馬主軍軍事立嚴雖卑亦同號也

護軍之名起于秦都護起于漢 志護軍都尉秦官武  
元狩四年屬大司馬成綏和元年居大司馬府比司直  
哀更名司寇平更名護軍陳平為護軍中尉班固為大  
將軍中護軍韓安國為護軍將軍魏置護軍將軍主武  
官選晉志百官曰魏以韓浩為護軍史漁為領軍非漢  
官也建安十二年改中護軍中領軍用蔣濟曹休元帝  
省明帝太寧復置領護各領營兵江左以來領軍不復

別領營護軍猶別有營也都護之名始于鄭吉蓋從前  
輪臺渠黎皆有田卒置使者校尉領護是時獨護南道  
日逐王降漢神爵三年乃因使吉并護北道遂名都護  
治烏壘城表言地節二年誤也唐大都護府大都護一  
人副大都護二人副都護二人宋開寶以丁璉為安南  
都護以其奉貢也建炎元年置都統制以王淵為之其  
下分為五軍紹興稱神武五軍俄又改為行營五護軍  
候奄軍候也晉張老為元候國語范獻子為候奄注

候奄元候也士富代張老也襄十九公享晉卿于蒲圃  
賜三命之服軍尉司馬司空輿尉候奄受一命之服漢  
有軍候又有假候中興不置中壘但置中候一人周有  
候人左傳使候出諸轆轤候本送迎賓客之官軍中候  
望之義也

授鉞壇拜也 唐渾瑊傳德宗巡狩山南瑊以諸運衛  
谷口帝臨軒授鉞用漢拜韓信故事終軍傳大將軍秉  
鉞抗旌擣玄傳四府舉玄為度遼將軍假黃鉞吳陸遜

假黃鉞晉成加王導假黃鉞謝安禦苻堅特假黃鉞

虎文武服也 後百官志武官服曰虎文袁紹傳被以

虎文注曰虎賁將冠鶻冠虎文單衣襄邑歲獻織成虎

文衣唐百騎衣五色袍乘六閑駿馬虎皮轄為游幸翊

衛

挾經秉枹挾兵書秉枹鼓也 吳語曰係馬舌出火竈

陳士卒百人以為徵行百行行頭皆官師擁鐸拱稽達

肥胡奉文犀之渠十行一嬖大夫建旗提鼓挾經秉枹

十旌一將軍載常建鼓挾經秉枹萬人以為方陳肥胡幡也稽榮戟也左傳之行首即徹行也

齊斧齊戒受斧也典故始于北魏然實因附會齊斧之易說也 魏志凡將出必齊戒之廟受斧故名齊斧本因資斧或作齊斧故沿立此名陳琳檄孫權要領不足以膏齊斧毛修之傳使齊斧停柯又宋前廢帝資鉄電斷是也智按陸德明釋文旅卦得其資斧子夏及衆家竝作齊斧張軌云齊斧蓋黃鉞斧也張晏曰整齊也應

劭曰齊利也虞喜志林曰齊當作齋齋戒入朝而受斧  
下卦同因此附會之說北朝耳食而立事制遂為典故  
出處天下可笑者寧止此一端邪

兵政

周之丘井蓋本於黃帝也 李靖問對曰黃帝始立丘  
井之法其形井字間方九焉五為陣法四為閒地此所  
謂數起于五也虛其中大將居之環其四面此所謂終  
于八也風后握奇圖不外是矣一作握機史記黃帝以

師兵為營衛正義曰環繞軍兵為營以自衛若轅門即其遺像

周制五伍十聯後世未有出此者也 周禮五人為伍十人為聯五家為比十家為聯四閭為族八閭為聯軍師旅卒兩伍即鄉州黨族閭比遂縣都鄼里隣易氏曰總不出五人之伍百人之卒也尉繚子伍制令五人為五十人為什五十人為屬百人為閭周書大聚云五戶為伍以首為長十夫為什以年為長管子內政亦伍其

鄙特以萬人為軍與司馬少異此蘇軾所謂王用繁曲而伯用簡直之說乎其法五家為軌有長十家為里有司四里為連有長十里為鄉有良人焉以為軍令五十人為小戎鄉有二千人為旅五鄉為帥故萬人為一軍三萬人以方行天下五鄙者五大夫各治一屬也吳語王孫雄設法百人為行十行一旌十旌一將軍引司馬法曰十人之帥執鈴百人帥執鐸千人帥執鼓萬人帥執大鼓晉蒐被廬作三軍襄十三年蒐綿上新軍無帥

使其什吏率其卒乘官屬以從下軍正義曰什吏謂十人長也則晉人為軍皆以什計之亦管子之法也魯三軍閼宮頌僖公曰公徒三萬鄭玄曰舉成數也迂矣按乘馬之法甸六十四井出戎馬四匹兵車一乘牛十二甲士三人卒七十二人舊說此畿外邦國法司馬法同方百里萬井三萬家革車百乘士千人徒二千人舊說此畿內采地法李靖之言三甲則指乘馬法矣

開敦閭伯之元卒即齊之申驅貳廣啓肱大殿楚之右

轍左追蓐前茅盧無中權後勁也 周書武順解曰五  
五二十五曰元卒一卒居前曰開猶啓也一卒居後曰  
敦猶殿也左右一卒曰閭四卒成衛曰伯一長三伯一  
長曰左一長曰右三右一長曰正三正一長曰卿一長  
曰辟君也此謂諸侯三軍襄十三年齊伐衛有前鋒軍  
曰先驅次前驅曰申驅公副車曰貳廣左翼曰啓右翼  
曰肱後軍曰大殿宣十二年言荆尸陳法在軍右者挾  
輶為戰備在左者追求草蓐為宿備慮無如今有斤候

蹠伏見騎賊舉絳幡見步賊舉白幡茅明也或時以茅為旌識此分中前後左右以立營陣也

魚麗鄭也荆尸楚也句卒越也皆伍法也 桓五年鄭為魚麗之陳先偏後五五承彌縫注司馬法車戰二十五乘為偏以車居前以伍次之宣十二年荆尸即二廣也廣有一卒卒偏之兩注十五乘為一廣古曠反司馬法百人為卒二十五人為兩車十五乘為大偏今廣十五乘亦用舊偏法復以二十五人為承副哀十七年越

子為左右句卒注鈎伍相著別為左右屯此皆用伍法  
也有謂注說不一者智按杜預以十五乘為大偏九乘  
為小偏尤大者有二十五乘之偏魚麗尤大之偏也二  
廣大偏也亟臣所舍之偏小偏也

伍卽什伍也 升菴引兵法會要五人為伍有參聚  
十人為卽有行列卽今作保鵠字從此

材官騎士猶六韜選法也 太公六韜選車士騎士法  
取年四十以上長七尺以上名曰武車武騎之士高紀

注如淳曰高不滿六尺二寸以下為罷癃漢儀注民年  
二十三為正一歲為衛士一歲為材官騎士習射御騎  
馳戰陳五十六乃免韓詩說二十從役三十受兵班昭  
曰古者十五受兵六十還兵光武紀注高祖選能引闕  
蹶張材力武猛者為輕車騎士材官樓船以立秋肄講  
光武罷復民伍刑法志曰踵秦置材官補兵志曰材官  
騎士屬郡都尉八月會都試水處為樓船

火子長火也 府兵十人為火火有長火礮騎之制內

弩手擇六戶白丁宗丁品子孫壯强者為四籍十人為火五火為團通典一人曰燭二人曰比三人曰參比參曰伍伍人為烈烈有頭二烈為火立火子五火為隊則彊騎之團也府兵以三百人為團則大團也漢鴻臚屬官有別火倘亦主外國隨從之卒長等乎木蘭詩有火伴今為通稱

曲制者部曲幡幟金鼓之制也官者百官之分道者糧路也主用者主軍費用也孫武子曰法者曲制官道

主用也青藤路史引鶻冠子作曲制官備主用今孫武子作官道

西京曰都肄東京曰秉之皆閱習也 刑法志武帝歲時講肄習武備通典十月都課試益漢承秦制十月幸長安水南門會五營士為八陣進退高紀十一年注材官騎士常以八月太守都尉令長丞會都試課殿最水處則習樓船燕王旦傳將軍都郎羽林注張晏曰都試也光祿挈令諸當試者不會都所免之王莽傳董忠方

講兵都肄後志立秋斬牲之禮曰驅劉一曰驅腰兵官  
皆肄孫吳兵法六十四陳名曰乘之魏閱兵東郊晉大  
閱于宣武觀唐禮志以仲冬講武都外其狩田曰圍田  
宋大閱西郊光武門外有西教場太平興國築臺于千  
秋門外之楊村曰講武臺嘗閱諸軍都試元及今日皆  
曰下操凡府縣皆有教場

尺籍兵簿也 漢立尺籍五符小宰聽政役以比居聽  
師田以簡稽注比居謂伍籍也簡稽士卒兵器簿書程

不識治軍簿長史急李廣之莫府上簿

羨卒卒之副也 采芑箋曰宣王承亂羨卒盡起羨謂  
家之副丁公劉詩其軍三單箋曰大國三軍以其餘卒  
為羨單者無羨卒疏曰單而無副也古者國有游倅田  
有餘夫軍有羨卒所以副其正也大司馬修閭氏與其  
國粥疏曰謂國家粥養入正卒且為羨卒者遂人疏曰  
天子六鄉六遂合有十二軍而止言六軍蓋六鄉為正  
六遂為副倅至大國之三鄉三遂次二鄉二遂小一鄉

一遂莫不皆然但以王家迭用之則常六軍耳

周之七萃漢之八校也 春官車僕掌戎車廣車闕車  
革車輕車之萃凡師共革車各以其萃會同亦如之萃  
猶副也萃與猝通穆天子傳曰七萃之士生捕虎天子  
蓄之東號號曰虎牢又曰賜七萃之士注萃聚也猶傳  
有七輿大夫聚集有智力者為王爪牙也王元長曲水  
序七萃連鑣虞羲詩雲屯七萃士白樂天云周設七萃  
漢列八屯漢初為五營五校武帝增置八校尉表有中

壘屯騎步兵越騎長水游騎射聲虎賁而游騎不常置故刑法志曰內增七校外有樓船建武改為五營其曰青巾即越騎也靈帝西園八校尉則上中下典助佐軍左右凡八而五校之稱自魏晉建江左皆因之

衛尉之八屯非八校也城門之八屯又非衛尉之屯也

西京賦衛尉八屯植鍛垂版注曰八校尉諸屯皆衛尉掌之此失之矣校尉北軍衛尉南軍宮門四面皆有公車每門各有二司馬凡八司馬故曰八屯元紀初元

五年司馬注師古說是也城門八屯者表城門校尉掌  
城門屯兵有司馬有十二城門候注師古曰八屯各有  
司馬王伯厚曰衛尉自有八屯與此不同衛尉主宿衛  
此主城門環濟要畧曰城門校尉高帝置從緹騎百二  
十人武帝始增屯兵

漢選募之士曰勇敢曰奔命曰伉健曰豪吏曰應募其  
罪徒曰謫民惡少曰亡命曰徒曰犯刑曰罪人曰應募  
罪人 武紀天漢中發勇敢士擊外國昭始元初發健

為蜀郡奔命擊益州注應劭曰舊時郡國皆有材官騎士以赴急難今有急常兵不足以討之故選精勇聞命奔走者李斐曰平居發者二十至五十為甲卒今十五至二十為奔命丙吉傳邊郡發奔命宣本始中大發伉健習騎射者從軍趙充國奏四月草生發屬國游騎伉健各千倅馬什二就草王溫舒傳會宛軍發詔召豪吏宣神爵元年發弛刑徒及應募佽飛射士充國願罷騎兵留弛刑應募及私從者其罪徒七科即弛刑之目又

按天漢四年發天下七科謫愚謂即罪徒七科而張晏  
曰吏有罪一亡命二贅婿三賈人四故有市籍五父母  
有市籍六大父母有市籍七想有據也又按吳起以棄  
城失守欲除其醜者聚為一卒曰軍之鍊銳王莽募天  
下囚徒以禦外國名曰豬突宣帝遣鄭吉將免刑田渠  
黎以攻車師光武發馬援將十二郡弛刑囚萬佐擊五  
溪蠻吳王僚罪人三千先犯胡沈陳三國勾踐死囚五  
百屬劍前行元用拔都魯杖牌攻安豐則用此者不乏

也

曰燕徒曰崇卒皆步兵也 左傳有徒兵荀吳崇卒魯言公徒充國曰步兵九校晁錯曰此步兵之地也

等杖兵樣也 建隆初置剩員以處退兵所汰之兵也又蒐强壮曰兵樣其後更為木挺差以尺寸高下之制謂之等杖祥符重定等杖為五等

唐之十二衛為南衙漢之南軍也六軍為北衙漢之壯軍也宋為三衙其實兩軍也 漢宮城門內為南軍宮

衛屯兵屬焉衛尉主之京城門外為壯軍京輔兵卒隸  
焉中衛主之唐兵志十六衛會要惟叙十二衛而監門  
千牛附列百官志曰左右衛驍衛武衛威衛領軍衛金  
吾衛監門衛千牛衛各有左右外為折衝果毅府李泌  
曰府兵為衛士神策為禁軍唐初有元從禁軍即父子  
軍以白渠腴田給之太宗擇善射于北門長上從獵曰  
百騎又置北衙七營號飛騎高宗置左右羽林武后改  
百騎曰千騎睿宗改萬騎玄宗平韋氏改龍武軍以萬

騎隸焉至德二載改曰神武天騎制如羽林總曰北衙六軍又置衙前射生手曰供奉射生此時以左右龍武左右神武左右神策號六軍也德宗幸梁還號奉天定難總曰十軍自此屬於內臣號天子禁兵云五代有私兵而親軍之號始于明宗後又有殿前都指揮使亦親軍也殿前司始于周世宗宋以此禪遂不除都檢點以殿前司與侍衛司馬步軍為三衙其實兩司而侍衛司都指揮使外又分置馬步軍都指揮使殿前司亦參馬

步軍總千都指揮使天下之兵領于此矣近代設錦衣  
等上十二衛以衛官禁設留守等四十八衛以衛京城  
亦南北軍也永樂都燕增至七十二衛而復有五軍營  
三千營神機營于少保選三大營為十營圓操成化為  
十二營自此衛軍漸為虛名而錦衣止于儀仗護衛三  
大營十二萬無南北名要以內官提督而勛臣統之添  
設戎政尚書佐之一科一道巡視竟曰北軍可也天啓  
中老父為職方見兵部呼應委艱乃奏立本部標兵三

千而債帥皆恃與援參遼逃將皆不行職方且供臺省  
頤指李邦華汰京營而戎政出矣老父前以不封魏良  
卿伯忤璫削籍崇禎賜環居火房絕請託止能依御覽  
冊推選為公而知將鼓礪非一手足之任樞在宥密平  
素不講惟有上容毋動為大耳已已尚寶假歸著全邊  
略記列師中表

漢之更代唐之番上也南北軍後有名募長從猶府兵  
後變而擴騎也 漢武增置八校凡越騎皆屬中尉而

北軍始有名募之兵又于光祿勲增羽林期門而與衛  
尉同掌宮門而南軍始有長從之兵後乃遠調已募外  
兵募吏民而更代之法寢弛更代者一歲為衛士一歲  
為材官騎士益寬饒傳衛卒願更留一年是郡國畊上  
于南軍之制黃霸為京兆尹發騎士詣北軍是三輔畊  
上于北軍之制魏相傅相守河南河南戍卒都官者二  
三千遮大將軍言願復留作一年以贖太守罪師古曰  
來京師詣官府為戍卒若今衛士上番分守諸司是也

府兵始于西魏大統中周文帝與蘇綽之策而備于隋唐因之凡發府兵下符契當宿衛有番上兵部以遠近給番自府兵壞衛佐為僮僕執役詆訾者呼為侍官諺曰將軍大礦騎衛佐小郎官張說置長從于南衙開元十三年號礦騎十六年改為羽林騎又百騎改十騎改萬騎亦名羽林肅宗時有供奉射生官代宗還京有禁旅都以神策為號魚朝恩領之自此而方鎮橫于外宦官以禁軍橫于內矣

魏五兵晉六軍五校則魏晉迨江左未之有改也 五  
兵即中外騎別都也後魏為七以中外分左右也晉以  
領護左右衛驍騎游擊為六軍武紀泰始元年初置四  
護軍以統城外諸軍又置中軍將軍以統宿衛七軍六  
典注魏武為丞相有武衛營太康十一年王佐為北軍  
中候領禁兵則仍有南北軍之制也五校則屯騎步兵  
越騎長水射聲也

廂軍起于唐而宋之廂軍號及天下禁軍稱自漢而宋

之禁軍亦徧天下 唐本用李靖兵法分左右廂自變  
廣騎遂謂禁兵諸道變為長征謂之鎮兵朱梁以鎮兵  
之制用之京師京師兵有四廂而諸軍兩廂遂有廂軍  
之名周世宗于方鎮寄招禁軍別立營部由是州郡始  
有禁軍宋太祖作階級法專治禁軍而天下鎮兵通謂  
之廂軍元豐兵令悉以雄節之類升同禁軍由是禁軍  
始徧天下熙寧部分諸將總隸禁旅謂之將兵宋法三  
司禁旅就糧州郡亦不常坐食于京師自列郡各置禁

軍于是嚴差出占破之令而壯城作院各置指揮由是在京禁旅無就糧者而廂軍亦升禁軍不復戍役矣丁度兵錄一曰禁兵殿前馬部三司隸焉二曰廂兵諸州隸焉三曰役兵郡有司隸焉四曰民兵農之健而材者籍之此四者盡矣

蜀有叟兵有壇丁 董卓傳叟兵蜀兵也在呂布軍中唐揚師立數陳敬瑄罪自言集本道壇丁十五萬人路振九國志孟知祥言蜀中諸郡有壇丁

昭義步兵山河子弟雄邊子弟唐之民兵也 李抱真  
在澤路以射賞罰遂號昭義步兵雄冠山東呂元膺留  
守東郡募撫山柵曰山河子弟李德裕節西川三百戶  
取一人教之曰雄邊子弟立十一軍

咸平保毅景德弓箭手康定宣毅慶歷義勇保捷治平  
潮循槍手熙寧邕州峒丁元豐保甲建炎團結巡社紹  
興荆郢雙丁槍杖子弟乾道淮南神勁皆宋之鄉兵也  
真宗咸平四年命使陝西稅人戶家出丁一號曰保

毅置標槍旁牌試之遂置廣捷兵景德二年知鎮戎軍  
曹瑋言應募弓箭手者請給以閒田許之仁宗慶歷募  
關中民補振武軍以吳遵路議復民兵簡河北强壮刺  
手背為義勇又刺河東又簡陝西弓手為保捷胡宿且  
請刺緣邊軍司馬光爭之是時弓箭社寨戶土丁擎手  
敢勇蕃兵各因其方名之通謂鄉兵而保甲之制則元  
豐以諸路義勇改為保甲也西邊神捷改名萬勝二十  
營京東西淮浙江南荆湖置宣毅軍則康定慶歷已置

矣建炎從李綱募兵詔諸軍團結旋即罷之以諸路民  
兵為忠義巡社英宗治平間廣東已置槍手熙寧間廣  
西置峒丁以防遏交趾率以三等戶五丁取一以充團  
結紹興三年許中帥廣西調峒丁靜江防拓三十一年  
詔淮漢間取主戶之雙丁十戶為甲五甲為團團有長  
荆門守臣姚岳籍民兵置槍杖號壯子弟張栻益修其  
法孝宗乾道元年漕臣馮忠嘉言教閱保甲湖北王炎  
言荆南團結義勇虞允文言興元義士可用令晁公武

訪弓箭手舊法得之瀘州為一書錄上神勁軍則淮南  
弩營也直州嘗置營寨要之宋時大勢業已失計迄于  
敗亡于民兵何責乎陳傅良曰國初州郡無禁兵自騎  
射至牢城名額二百餘總為本城而已禁軍皆三司之  
卒分屯更戍今屯泊駐泊之名而鈴轄都監監押之官  
所部領也三邊之兵間因事宜升為禁軍者所謂四十  
四處禁軍是已是為就糧自元昊叛而西北有保毅王  
倫起而東南有宣毅於是列郡稍置禁軍至嘉祐中置

威果凡二十五指揮亦九大郡要害之處熙寧按天下  
廂軍籍五十萬人而不知戰于是教閱之法起其後以  
廂軍團併為額今兩浙崇節福廣保節之類是已教閱  
之兵因別為額而隸之將下今兩浙雄節福建廣節之  
類是已方成法之行也三司禁旅轉徙于四方而州郡  
廂軍大抵以供百役益勞之則易使散之則易養此藝  
祖神謀也自州郡各有禁軍三司之卒不出常坐食于  
京師于是養兵始為大患蘇軾以宋遣禁兵戍天下為

非是東魯王損載河北鋤社與弓箭社同意本周寓兵于農所謂用其生力為死力也按今時之民兵仍宋保甲若各地所產當時如直隸保定徐邳箭手河南嵩蘆涉及永寧登豐宜陽靈寶等縣之毛葫蘆礦夫角腦江南太倉崇明嘉定沙兵四川白桿子浙金華義烏東陽鉢牌處州坑軍杭嘉湖鹽徒湖廣搶弩鈎鎗閩漳環被籐牌江右長寧大旗閩粵緣山赤腳少林伏牛五臺蓮花寺選皆係民兵之素鍊籍之即為精良者

少從猶僕也客從以他客相從也私從私所募也義從所在以義收合也張騫傳少從進執猶言大使少使也舊說少年從使非也丙倩初以客從入漢留勝以客吏初起趙充國願留淮陽汝南步兵與吏士私從者私從亦客從客吏之類由戰國養客以來士皆稱客李陵曰奇材劍客是也雷被願奮擊北歸曰私從李廣傳負私從者不與鄧訓傳章和二年為校尉湟中皆言待我恩信訓撫養其少年勇者數百人為義從順帝詔趙冲

督河西兵勝兵分在湟中令居號義從鄭泰傳義從八  
種魏志梁習傳承高幹後次發諸丁強以為義從其言  
義作則助公家之力役也

積射士材官騎發也 鮮卑傳元初五年發緣邊積射  
士六年鄧遵發積射士追擊陽嘉四年發積射士度遼  
營謂積能善射之士也晁錯所云材官騎發亦謂善射  
也騎矢之善者是與嚴同馮奉世傳發越騎迹射即積  
射也晉咸寧中樊震為積射將軍西城牙門

塉壁屯守也 元初元年遣兵屯河內通俗衝要皆作  
塉壁董卓郿塉陽嘉元年緣海各屯兵而扶風漢陽三  
百塉魏郡恒山六百十六塉晉永嘉亂後以塉自守皆  
曰塉主魏浚屯洛北石梁塉魏該聚衆據一泉塉祖逖  
破蓬陂塉主陳川是也吳玠在陝因家計砦連七十砦  
即是塉壁

壯府兵京口兵也君子營義興人也吳中子弟荆楚劍  
客宣潤擎手皆東南兵也 劉牢之領精銳號壯府兵

東晉謂京口兵可用劉超為義興守拜中書侍郎其人  
多義隨超因以宿衛號君子營以越有君子六千人也  
漢高祖用閩越兵孝景用東甌兵武帝用會稽兵光武  
用江夏兵周瑜勝赤壁謝玄勝淝水虞潭以東方兵共  
平僭亂劉裕平南燕入長安陳霸先以韶州兵平侯景  
皆未嘗募之西北也漢置都尉九十而九江臨淮會稽  
丹陽豫章財各一尉唐府兵六百三十餘所江淮兩道  
不過八九蓋近都為多耳北善騎南善步研營伎從來

稱之亦在乎用兵者耳

背嵬大將親軍之稱也。雲麓漫抄言北人呼酒瓶為  
嵬大將令人負之。大昌引章氏摘簡贊筆曰：背嵬即圓  
牌也。朱漆金花，予見都統郭綱乃韓蘄王背嵬也。讀嵬  
平聲。沈括詩曰：銀裝背嵬打回回，則為去聲。王應麟曰：  
宋時大將別置一軍，曰背嵬，莫是以嵬為嵬而訛邪？乾  
道九年，趙摶以所領五軍騎步各一千人為親嵬選鋒。  
軍詔可。唐藩鎮有牙兵，有銀都，皆親兵。王智興徐州置

銀刀都王式除之楊行密有黑雲都蜀崔安潛與忠武  
有黃頭軍吳曾曰樂彥禎親兵謂之子將

分團之名起于西魏而後因之 西魏二十四軍分團  
統領隨征遼東步卒八十隊分為四團唐有將軍分統  
四府府有郎將副郎將坊主團主以相統治府兵之制  
士以三百人為團團有校尉唐六典言關內團結兵建  
炎以李納議詔諸軍團結以五人為伍五之以至甲隊  
為部一千二百五十人為軍其後以廂軍團併為額向

日京營分十二團營後為三大營下操曰團操其曰團練團結皆鄉兵也

常選用常所選也 衛青傳所將常選

長上長直不番上也 討堅下詔長上將士長上者長上宿衛將士也 貞元置十六衛上將軍左右衛以下皆有長史錄事倉曹兵曹騎曹胄曹司階中候司戈執戟長上又百騎亦曰壯門長上智按長上不獨將士之名也咸平二年按故事開元置侍讀後有侍講因以楊徽之

等為侍讀邢昺為侍講設直廬于秘閣侍讀更直侍講  
長上八月徽之等赴職賜宴秘閣兩制皆預上作七言  
詩賜之崔令欽教坊記以每日長在至尊左右曰長入  
亦此意也直日之名自漢有之文王世子御者注如今  
小史直日矣

白直隊直也 劉裕遣白直隊主丁旿渡北岸豎白眊  
南齊曹武與戴僧靜各領白直三百人江左諸王有白  
直夾轂隊宋杜鎬言唐給百官厚加以白直執刀防閣

掌故之類悉許私用役使白直言白身上直也凡言直者皆為隊直宋太平二年改簇御馬為簇御龍直骨錄子直曰御龍骨錄子直軍頭引見司有馬步兩直禁衛有軍頭藩鎮有廳頭宋藝祖取太原兵以為龍衛取幽州兵以為神武員僚本藩鎮廳頭也

白徒猶白身也 管子乘馬篇白徒三十人奉車兩猶府兵之取白丁也唐宦官又有品官白身之名魏召白民入五百粟贖其身則可知白徒白身之稱矣

游奕游闕也 左傳楚潘黨率游闕四十乘注游車補  
闕者晉以來有游奕紹興八年三衙馬軍每十將為五  
軍九年改衙兵為游奕軍乾道八年西兵為御前游奕  
軍今之言握奇陣法者以後為游兵即其意也

快手健丁也 黃回募江楚快手八百隸劉勔乃伉健  
勇敢之稱今專為郡縣所督捕衙役之名晉太康元年  
去州郡兵大郡置武吏百人小郡五十人此今日快手  
之自也

角手軍中吹角者也 唐兵志角手吹大角一通猶今之稱吹手也

排攢手短槍彭排也 隋時有嶺南排鑼七亂反 手小稍

也余以鑼即鑼字唐兵志以騎而射者為越騎其餘為步兵武騎排攢手步射

馱幕法言備什物也 宋祁言唐兵每十為五馱法馬牛任從所便什物鍋幕皆具乞檢求唐馱幕法按唐兵志府兵十人為火備六馱馬初置八馱後改為六凡火

具烏布幕鐵馬盂布槽鉤鑿鑿碓筐斧鉗鋸皆一甲牀  
二鎌三隊具火鑽一胷馬繩二首羈足絆皆三今人以  
邊裝弓箭撒袋等為什物蓋本於此以什長而備物也  
翹闊負米選飛騎之法也 兵志貞觀十二年置左右  
屯營于玄武門領以諸衛將軍號飛騎其法取戶二等  
以上長六尺闊壯者試弓馬四次上翹闊五負米三十  
步者翹闊長丈七尺徑三寸半凡十舉後手持闊距出  
處無過一尺膺云持闊頭而翹舉其末也

射長垛唐武舉之法也 六典兵部員外郎掌貢舉有  
二科一曰平射一曰武舉其試用有七曰射長垛騎射  
馬槍步射材貌言語舉重長安二年始置武舉制有長  
垛馬射步射平射筒射又有翹闕負米天寶元年敕長  
垛限以十箭六載制武舉謁太公廟每歲不過十人郭  
子儀以武舉異等補左衛長史宋咸平天聖治平皆定  
武舉法嘗于殿試策熙寧二年侍御劉孝孫請武科分  
三場凡武舉人射兩石弓馬射九斗謂之絕倫雖程文

不合格并賜及第王卿月始以武舉鎖廳登進士第江文虎淳熙八年武舉第一人十一年進士授承事郎後罷鎖廳之命

限腰引弩琵琶車軸募膂力也 馬隆為武威太守募限腰引弩三十六鈞弓四鈞立標簡試自旦至日中得三千五百人宋張舜民畫墁錄言藝祖選琵琶腿車軸身取多力

隋之擊磬唐之網鈴皆羅闐狗附類也 國語盟於宋

候遮扞衛不行注候候望遮遮罔也晝則候遮夜則扞衛扞衛謂羅闈狗附也去壘五十步而陳周軍之前後左右彊弩注矢以誰何謂之羅闈又二十人為曹輩去壘三百步畜犬其中或視前後或視左右謂之狗附皆昏說明罷候遮日居狗附處以視聽候望明設昏罷隋設六合版城次內布鐵菱角次內施蟄鞬機也中施擎牀林枕挿鋼錐皆長五寸謂之蝦鬚其外又以矰周圍一鈴一柱施槌磬連繒名為擊磬扞禦可謂精密唐禦突厥

厥有網設鈴以犬護之皆羅闔狗附之法也



通雅卷二十五